


| Tertib Surah | Nama Surah | Bilangan Ayat | Bilangan Ruku` | Makkiyyah / Madaniyyah | Tertib Turun | Bilangan Paragraf |
|--------------|------------|---------------|----------------|------------------------|--------------|-------------------|
| Ke-57 | Al-Hadid | 29 | 4 | Madaniyyah | Ke-94 | 5 |



Zaman Diturunkan

Surah al-Hadid diturunkan sebelum peristiwa perdamaian di Hudaibiyah sekitar tahun ke-5 dan ke-6 Hijrah, ketika itu kesediaan orang-orang Islam untuk mengorbankan nyawa dan juga harta dalam jihad mereka terhadap orang-orang kafir sangat-sangat diperlukan. Di dalam surah ini mereka diminta supaya selain berjihad بِالْحَدِيدِ (berjihad menggunakan senjata) mereka juga diminta supaya berjihad بِالْمَالِ (dengan harta benda) iaitu infaq. Dari segi tartib kitabi, Surah al-Hadid mula-mula sekali disebut, kemudian Surah al-Mujadilah kemudian Surah al-Hasyr dan akhir sekali Surah al-Mumtahanah. Tetapi jika dilihat dari sudut tartib nuzuli, maka Surah al-Hasyr adalah surah yang mula-mula sekali diturunkan, ia diturunkan pada tahun ke-4 Hijrah. Selepas itu Surah al-Hadid, ia diturunkan di permulaan tahun ke-5, selepas itu Surah al-Mujadilah, ia juga diturunkan di akhir tahun ke-5 Hijrah, kemudian akhir sekali Surah al-Mumtahanah, ia diturunkan di permulaan tahun ke-8 Hijrah.

Perkaitan Surah Al-Hadid Dengan Surah Sebelum Dan Selepasnya

1. Di dalam Surah al-Waqi'ah telah disebutkan pahala dan ganjaran yang diperolehi golongan السَّابِقُونَ dan golongan أَصْحَابُ الْيَمِينِ. Di dalam Surah al-Hadid ini pula disebutkan sifat-sifat mereka, mereka adalah orang-orang yang yakin sepenuhnya terhadap sifat-sifat Allah, selain berbelanja dengan banyak di jalan Allah mereka juga berjihad menentang musuh-musuh yang menceroboh dari luar, selain itu mereka juga menegakkan keadilan dalam masyarakat.
2. Di dalam Surah al-Mujadilah akan datang, terdapat pula arahan memerangi musuh-musuh Islam dari dalam iaitu golongan munafiq, sifat-sifat mereka disebutkan.

Perkaitan Tema-Tema Di Dalam Surah Al-Hadid

Di dalam Surah al-Hadid mula-mula sekali disebutkan tentang sifat-sifat Allah dan keimanan kepadanya, selepas itu orang-orang Islam dituntut supaya membelanjakan harta benda di jalan Allah. Selepas itu mereka dituntut supaya berjihad dan berperang dan akhir sekali mereka diseru supaya menegakkan keadilan dalam masyarakat yang merupakan salah satu matlamat utama sekalian Rasul diutuskan.

Tanpa adanya aqidah tauhid dan pengetahuan tentang asma' dan sifat Allah, jihad adalah suatu yang mustahil. Sebelum berjihad dengan jiwa raga, jihad dengan harta benda dengan membelanjakannya di jalan Allah adalah suatu yang mesti. Tanpa berjihad, negara Islam tidak mungkin ditegakkan dan tanpa adanya kerajaan Islam, sistem yang adil tidak dapat ditegakkan. Firman Allah لَيَقُومَنَّ النَّاسُ بِالْقِسْطِ (Ayat: 25) tidak akan terlaksana.

Beberapa Halangan Yang Tersebut Di Dalam Surah Al-Hadid

Di dalam Surah al-Hadid tersebut beberapa halangan berikut, halangan paling besar di jalan iman yang sempurna ialah tidak mengetahui sifat-sifat Allah. (Ayat: 1-6). Halangan yang paling besar di jalan infaq ialah sifat bakhil dan cintakan dunia (Ayat: 24). Halangan yang paling besar di jalan jihad ialah cara hidup رهبانية (Ayat: 27).

Beberapa Kata Kunci Dan Tema Utama Surah

1. **هُوَ الْأَوَّلُ وَالْآخِرُ وَالظَّاهِرُ وَالْبَاطِنُ** (Ayat: 3). Melalui ayat ini zat (diri) Allah diperkenalkan, Dia adalah yang pertama bererti Dialah yang menjadikan sekalian makhluk, sekalian makhluk adalah ciptaanNya. Dia adalah الباطن, dilihat kepada sudut zat dan hakikatNya yang tersembunyi tetapi dilihat dari sudut tanda-tandaNya, Dia adalah الظاهر (yang sangat nyata).

2. Galakan supaya membelanjakan harta di jalan Allah (infaq) telah dikemukakan dengan berbagai-bagai cara.

(a) Mula-mula dikatakan: “Kamu hendaklah membelanjakan sedikit hartaKu yang Aku jadikan kamu sebagai khalifah (wakil) untuk menjaganya” (Ayat: 7).

وَأَنْفِقُوا مِمَّا جَعَلَكُمْ مُسْتَخْلِفِينَ فِيهِ

(b) Orang-orang Islam dikejutkan dengan soalan: “Kenapa kamu tidak mahu berbelanja (di jalan Allah)?” (Ayat: 10).

وَمَا لَكُمْ أَلَّا تُنْفِقُوا فِي سَبِيلِ اللَّهِ

(c) Hakikat bahawa jika manusia tidak berbelanja sebelum kematiannya maka hartanya akan diwarisi Allah (Ayat: 10).

وَلِلَّهِ مِيرَاثُ السَّمَوَاتِ وَالْأَرْضِ

(d) Dinyatakan perbelanjaan dan peperangan yang dilakukan selepas pembukaan Mekah tidak sama dengan perbelanjaan dan peperangan yang dilakukan sebelumnya (Ayat: 10).

(e) Orang-orang Islam diminta supaya memberikan القرض الحسن iaitu hutang dengan bayaran yang lebih daripada hutang asal (Ayat: 11).

(f) Orang-orang yang memberikan القرض الحسن diberikan berita gembira akan mendapat pahala dan ganjaran yang istimewa (Ayat: 11).

3. Daripada firman Allah (Ayat: 10):

لَا يَسْتَوِي مِنْكُمْ مَنْ أَنْفَقَ مِنْ قَبْلِ الْفَتْحِ وَقَتَّلَ

Dapat diketahui bahawa para sahabat itu tidak sama darjatnya, walaupun semua mereka dijanjikan

kebaikan tetapi para sahabat seramai 1,400 orang yang terlibat dalam Bai'ah Ridhwan sebelum berlakunya peristiwa perjanjian damai di Hudaibiyah lebih afdhal daripada sahabat selepasnya. Demikian juga para sahabat yang menyertai pembukaan Mekah seramai 10,000 orang lebih afdhal daripada para sahabat yang ikut serta mengerjakan haji terakhir (haji wada') bersama Rasulullah seramai lebih 100,000 orang. Perkataan الفتح yang tersebut di dalam ayat ini boleh diterima dengan erti perjanjian damai di Hudaibiyah, boleh juga dengan erti pembukaan Mekah.

4. Melalui firman Allah (Ayat: 16):

أَلَمْ يَأْنِ لِلَّذِينَ ءَامَنُوا أَنْ تَخْشَعَ قُلُوبُهُمْ لِذِكْرِ اللَّهِ وَمَا نَزَلَ مِنَ الْحَقِّ

Dinyatakan ada perbezaan di antara hati yang khusyu' dan hati yang keras. Orang yang mempunyai hati yang khusyu' tidak akan ada sifat bakhil padanya, dia akan bersifat murah dan cintanya kepada dunia tidak seberapa. Orang-orang yang mempunyai hati keras pula akan menjadi seperti Ahli Kitab yang tidak menerima Islam, hidupnya penuh dengan kefasiqan dan amalan-amalan yang buruk.

5. Melalui firman Allah (Ayat: 20):

أَعْلَمُوا أَنَّمَا الْحَيَاةُ الدُّنْيَا لَعِبٌ وَلَهُمْ زِينَةٌ وَتَفَاخُرٌ بَيْنَكُمْ وَتَكَاثُرٌ فِي الْأَمْوَالِ وَالْأَوْلَادِ

Beberapa peringkat dan fenomena kehidupan di dunia disebutkan dengan 6 perkataan.

- (a) لَعِبٌ Permainan, seperti permainan kanak-kanak yang langsung tidak mempunyai kelazatan.
- (b) لَهُمْ Hiburan, yang walaupun ada kelazatannya tetapi ia baru dirasai setelah manusia menjangkau umur remaja.
- (c) زِينَةٌ Bererti perhiasan, gaya hidup dan persolekan yang timbul minat manusia kepadanya setelah menjangkau umur dewasa.
- (d) تَفَاخُرٌ Adalah suatu peringkat dan fenomena kehidupan di mana manusia suka menyebutkan kelebihannya kepada orang lain dan berbangga dengannya di samping mengaggap dirinya lebih daripada orang lain kerananya.
- (e) تَكَاثُرٌ فِي الْأَمْوَالِ Iaitu berlumba-lumba memperbanyakkan harta supaya melebihi orang lain dan seronok dengannya.
- (f) تَكَاثُرٌ فِي الْأَوْلَادِ iaitu keinginan mempunyai lebih ramai anak berbanding orang lain.

6. Firman Allah سَابِقُوا إِلَىٰ مَغْفِرَةٍ مِّن رَّبِّكُمْ وَجَنَّةٍ سَبِقَةٍ (Ayat: 21) Menuntut manusia berlumba-lumba mendapatkan 2 perkara. Pertamanya ialah keampunan Allah dan keduanya adalah syurga. سَبِقَةٍ ialah keinginan dan semangat untuk berada di hadapan orang lain dan melebihi orang lain dalam perkara-perkara kebaikan. Kerananyalah lahir golongan manusia السابِقون.

7. Melalui firman Allah لَيَقُومَنَّ النَّاسُ بِالْقِسْطِ (Ayat: 25), manusia difahamkan bahawa Rasulullah tidak diutuskan semata-mata untuk menyampaikan aqidah dan cara beribadat, bahkan salah satu tujuan pengutusannya ke dunia ialah untuk menegakkan keadilan masyarakat melalui jihad. Melalui sistem zakat dan lain-lain punca pendapatan, keadilan ekonomi, kemasyarakatan, politik dan lain-lain boleh dicapai.

8. Firman Allah (Ayat: 27):

وَرَهْبَانِيَّةً ابْتَدَعُوهَا مَا كَتَبْنَاهَا عَلَيْهِمْ

Melalui ayat ini, cara hidup رهبانية (kependetaan dan kepaderian) dikatakan suatu perkara bid'ah yang tidak pernah diajar oleh Allah. Di dalam agama Kristian, bid'ah seperti itu ditimbulkan mula-mulanya dengan niat yang baik kemudian ia melampaui batas. Ahli Kitab diseru supaya meninggalkan رهبانية dengan memeluk agama Islam, mereka diseru juga supaya berjihad dan bersama-sama menegakkan kerajaan Islam yang kuat untuk menegakkan keadilan seperti yang dilakukan oleh sekalian rasul.

9. Perkataan نُور beberapa kali digunakan di dalam surah ini.

(a) Allahlah yang telah menurunkan ayat-ayat al-Qu'ran kepada Rasulullah supaya Baginda mengeluarkan orang-orang Islam daripada kegelapan kepada نُور (cahaya) (Ayat: 9).

(b) Di hari kiamat nanti, kerana berbelanja di jalan Allah orang-orang mu'min baik lelaki dan perempuan akan mendapat نُور (cahaya) yang menyuluh di hadapannya (Ayat: 12).

(c) Pada hari kiamat nanti, orang-orang munafiq baik lelaki atau perempuan akan meminta نُور daripada orang-orang lelaki dan perempuan mu'min tetapi نُور itu tidak akan diberikan kepada mereka (Ayat: 13).

(d) Orang-orang yang beriman kepada Allah dan rasul adalah صديق dan شهيد, mereka akan mendapat ganjaran serta نُور daripada Allah (Ayat: 19).

(e) Ahli Kitab juga akan diberi Allah نُور jika mereka beriman kepada rasul terakhir. Mereka akan dapat berjalan bersuluhkan نُور itu (Ayat: 28).

10. Perkataan مَغْفِرَة juga beberapa kali digunakan di dalam surah ini.

(a) Di akhirat nanti ada عذاب شديد (azab yang dahsyat), مَغْفِرَة (keampunan) dan رضوان (keredhaan Allah) juga ada di sana (Ayat: 20).

(b) Untuk mendapat مَغْفِرَة (keampunan) Allah dan syurgaNya, manusia hendaklah berlumba-lumba melakukan kebaikan dan kerja-kerja kebajikan. Mereka hendaklah terkedepan dan mendahului orang lain untuk dapat masuk ke dalam saf السابقين (Ayat: 21).

(c) Ahli Kitab juga akan mendapat مَغْفِرَة (keampunan) dari Allah jika mereka percaya kepada Rasul

terakhir.